

光緒山西通志

鄉賢錄四

錄二之四

山西通志第一百十九

賜進士出身頭品頂戴兵部侍郎兼都察院右副都御史巡撫山西提督電務臣張煦奉

旨監修

西魏 東魏 北齊

宇文導字菩薩周文兄顥之次子也少雄豪自武川遷居晉陽與周文隨賀拔岳入關常從征伐進斬侯莫陳悅於牽屯山封饒陽縣伯魏文帝東征留爲華州刺史趙青雀于伏德慕容思慶作亂導擒伏德斬思慶進章武郡公加侍中周文東征爲大都督行華州刺史甚得守扞之方及西軍不利東魏追至稠桑知關中有備乃退代獨孤信爲秦州刺史大都督十五州諸軍事周文帝討齊文宣又徵拜大將軍大都督二十三州諸軍事屯咸陽軍還乃旋舊鎮導性寬明善撫御

周文每出征導恒居守深爲吏人所附朝廷重之卒於上邽
贈尙書令謚曰孝朝議以導撫和西戎威恩顯著欲令世鎮
隴右以彰厥德乃葬上邽城西無疆原華戎會葬者萬餘人
悲號振野皆曰我君捨我乎負土成墳高五十餘尺周八十
餘步爲官司所止然後泣辭而去周天和五年贈太師柱國
公

乙連孤佛保北秀容酋也少驍武善射孝武帝時爲直閤將
軍從入關封蒲子縣公賜弓矢大統初梁將蘭欽陷漢中佛
保時爲都督統兵力戰知將敗仰天大哭曰此馬吾常所乘
此弓矢天恩賜我豈可令賊得吾弓馬乎遂斬馬及弓自刎
而死三軍莫不壯之黃門郎趙僧慶收運其尸致長安詔著
作錄之

以上太原府

薛孝通字士達河東汾陰人征虜將軍聰子也博學有雋才
蕭質資征關中引參驃騎大將軍府事禮遇甚隆質資將有
異志孝通悟其萌託以拜埽求歸元顥入洛宗人薛永宗修
義等應之孝通與所親計曰北海乘虛遠入吳兵不能久住
事必無成今若與永宗等同舉滅族道也乃率其近親與河
東太守元襲嬰城固守及寶資平定元顥退走預事者咸懼
禍唯同孝通者皆免除員外散騎侍郎余朱天光鎮關右表
大行臺郎中深見任遇關中平定預有其力賜爵汾陰侯定
冊立節閔帝以首創大議拜銀青光祿大夫散騎常侍兼中
書舍人封藍田縣子孝通求以官贖亡兄景懋又言已有侯
爵請轉授兄息子舒詔特贈景懋撫軍北雍州刺史孝通尋
遷中書郎深爲節閔所知重普泰二年正月乙酉宴奏絃管

因使賦詩孝通曰既逢堯舜君願上萬年壽帝曰卿所謂壽豈容徒然使命酌酒賜孝通孝通卽登忠爲韻帝曰卿不忘忠臣之心時孝通內典機密外參朝政汲引人物知名士多見推薦外兄裴伯茂性傲唯欽賞孝通每有著述共參同異孝通謂之曰吾以阮籍嵇康何如管仲樂毅蓋自許經綸抑裴傲也齊神武起兵節閔謀鎮邊關右問誰可任者孝通與賀拔岳同事天光又與周文帝有舊二人先在關右因竝推薦之乃超授岳岐華秦雍諸軍事關西大行臺雍州牧周文爲左丞孝通爲右丞齋詔書馳驛入關授岳等同鎮長安岳深相器重與周文結爲兄弟孝武帝初齊神武徵岳爲冀州刺史岳欲單馬入朝孝通曰高王以數千鮮卑破尔朱百萬之衆其鋒誠亦難敵然公兩兄太師領軍宿在其上侯深樊

子鶴賈知斛斯椿大野胡也拔吒延慶之徒皆其夷等韓陵之役此輩前後降附皆由事勢危逼非其本心在於高王曹操之孔融馬懿之葛誕今或在京師或據州鎮除之又失人望留之心腹之疾雖令孫騰在闕下婁昭處鈞陳必不能如建安之時明矣今吐萬仁雖復退逸猶在并州高王先須平殄安置內外何能去其巢穴與公事關中地也且六郡良家之子三輔禮義之人皆係仰於公効其智力據華州以爲城雉因黃河而爲池塹退守不失封泥進兵同於建水乃欲束手受制不亦難乎言未卒岳執孝通手曰君言是也乃遜辭爲啟而不受徵太昌元年因使入朝被留重除中書侍郎永熙三年三月出爲常山太守仍以經節閔任遇故也孝武西遷徵赴晉陽不加位秩但引爲坐客時訪文典齊神武讓劔

履上殿表猶使爲文會與諸人同詣晉祠皆屈膝盡禮孝通
獨捧手不拜興和二年卒於鄴魏前二年贈車騎將軍儀同
三司青州刺史齊武平初亦贈鄭州刺史著文集八十卷

薛愷字景猷河東汾陰人曾祖宏做避地襄陽愷躬耕以養
祖母暇則覽文籍既羈旅不被擢用常嘆曰豈能五十年戴
憤死一校尉也常鬱鬱不得志左郎中將京兆韋潛度勸令
參吏部愷曰世胄躡高位英俊沈下寮古人以爲歎息竊所
未能也潛度告人曰此年少實慷慨但不遭時耳孝昌中杖
策還洛陽屬尔朱榮廢立遂還河東止從叔懷儁家不交人
物終日讀書鈔略將二百卷唯郡守元襲時相要屈普泰中
拜給事中加伏波將軍齊神武起兵愷謂族人孝通曰高歡
阻兵陵上喪亂方始關中形勝之地必有霸王據之乃與孝

通俱游長安侯莫陳悅召爲行臺郎除鎮遠將軍步兵校尉
及悅害賀拔岳愷謂所親曰悅才略本寡輒害良將敗亡之
事其則不遠吾屬今卽爲人虜何慶之有尋而周文平悅引
爲記室參軍武帝西遷授征虜將軍封夏陽縣男文帝卽位
拜中書侍郎加安東將軍進爵伯大統四年宣光清徽殿初
成愷爲之頌又爲仙人水芝二欝器頌周文嘗令與盧辯檀
翁等參守儀制以流離世故不聽音樂後坐事沒子舒嗣官
至禮部下大夫儀同大將軍聘陳使副

薛裕字仁友汾陰人端弟少以孝悌聞於州里弱冠爲丞相
參軍事慕京兆韋夔恬靜數載酒肴往候談宴終日夔遂以
從孫女妻之裕嘗謂親友曰大丈夫當聖明之運而無灼然
文武之用爲世所知雖復栖遑徒爲勞苦耳至如韋居士退

不邱壑進不市朝怡然守道榮辱弗及其樂也裕卒文章士誅者數人周文惜之追贈洛陽刺史

以上蒲州府

長孫稚字承業以字行代人上黨王觀子也六歲襲爵降公孝文時以其幼承家業賜名字焉承業聰敏有才藝虛心愛士爲前將軍從南討宣武時爲揚州刺史假鎮南大將軍都督淮南諸軍事梁將裴遠虞鴻襲據壽春承業諸子驍果遂頗難之號曰鐵小兒詔河間王琛總眾援之琛欲決戰承業以久雨須持重琛弗從遂敗承業後殿還爲大都督北討鮮于修禮尋解行臺遣河間王琛爲大都督前到滹沱承業未欲戰琛不從行遂五鹿爲修禮邀擊遂敗與琛並除名尋復假鎮西將軍討蜀都督頻戰正平郡有功除平東將軍復爵後除尙書右僕射爲行臺討蕭寶夤時背疽未愈靈太后勞

之答曰死而後已敢不自力時子彥亦患脚痺扶杖入辭尙書僕射元願曰吾等備位大臣各居寵位危難之日病者先行毋乃不可乎薛鳳賢據正平薛脩義屯河東分據鹽池攻圍蒲坂以應寶黃承業乃據河東時詔廢鹽池稅上表爭之及雍州平除雍州刺史孝莊初封上黨王尋改馮翊後降郡公遷司徒公加侍中兼尙書令大行舉仍鎮長安節閔立遷太尉公錄尙書事韓陵賈斯椿使承業人洛啟節閔誅世隆兄弟孝武初轉太傅以定策功更封開國子帝入關隨赴夏安位太師錄尙書事封上黨王大統元年卒贈假黃鉞大丞相都督三十州軍事雍州刺史謚文宣子五皆雄武

長孫子彥本名儁承業子有膂力累從父征討封槐里縣子孝武帝立加中軍大都督行臺僕射鎮恒農從帝入關封高

平郡公位儀同三司以從征寶泰戰沙苑加開府侍中及東復舊京又兼尚書令行司州牧留鎮洛陽後以不利班師大統七年拜太子太傅子彥少嘗墜馬折臂肘上骨起寸餘乃命開肉鋸骨流血數升言戲自若時以爲踰於關公末年石發卒文帝聞之慟哭曰失我良將贈雍州刺史弟子裕位衛尉少卿

婁寶字道成代人伏連曾孫性惇樸好讀書明帝時仕至朔州刺史考爲天下最後隨大都督源子邕討葛榮師敗被囚於榮軍變姓名匿戎伍以免害久之賊中有朔州人識寶者將詣榮榮笑曰得免亂兵此行善之驗也寶遇逃者密啟賊形勢規爲內應上感其壯志授寶子景賢員外散騎常侍郎榮滅始得還永安中除假員外散騎常侍使蠕蠕時書爲敵

國儀寶賁之端蠅遂更稱藩孝武較鎮桓農後從入關封虜甯縣伯大統元年領著作郎監脩國史別封平城縣子後授國子祭酒侍中進儀同三司兼太子太傅攝東宮詹事寶清簡少言頗諳舊事位歷師傅守靖謙恭以此爲人所敬後行涇州事卒於州以上大

柳蚪字仲盤河東解人五世祖恭後趙河東郡守後仕江表祖緝宋州別駕宋安郡守父僧習善隸書敏於當世與豫州刺史裴叔業掾州歸魏歷北地潁川二郡守揚州大中正蚪年十三專精好學時貴游並車服華盛唯蚪不事容飾徧受五經略通大義兼涉子史雅好屬文孝昌中揚州刺史李憲舉秀才兗州刺史馮儁引爲府主簿揚州刺史樊義又以爲揚州中從事加鎮遠將軍棄官還洛陽大統三年馮翊王元

季海領軍獨孤信鎮洛陽舊時京人物唯蚪在陽城裴詼在
潁川信等俱徵之以蚪爲行臺郎中詼爲北府屬竝掌文翰
時人語曰北府裴詼南府柳蚪蚪勵精從事通夜不寢季海
常云柳郎中判事我不復重看四年入朝爲獨孤信開府從
事中郎信出鎮秦隴爲二府司馬不綜府事唯在左右談論
而已因使留爲丞相府記室封美陽縣男請史官記事者當
朝顯言其狀事遂施行十四年除祕書丞領著作舊丞不參
史事始令監掌焉遷中書侍郎修起居注仍領丞事蚪以爲
時有古今非文有古今爲文質論廢帝初遷祕書監加車騎
大將軍儀同三司蚪嘗敝衣蔬食曰衣不過適體食不過充
飢孜孜營求徒勞思慮耳恭帝元年冬卒年五十四贈兗州
刺史謚曰孝有文章數十篇行於世子鴻漸嗣

柳槍字季華虬弟性剛果任氣少文善騎射年十八起家奉朝請居父喪毀瘠骨立服闋除陽城郡丞防城都督大統四年從戰河橋先登授都督鎮鄯州八年拜湟河郡守仍典軍事尋加平東將軍天中大夫吐谷渾入寇槍兵少撫而勉之眾心乃安因率數千人先擊餘眾乘之渾大敗走封萬年縣子時吐谷渾數侵疆場槍屢戰必破之數年不敢爲寇十四年遷河州別駕轉帥都督俄拜使持節撫軍將軍大都督居三載徵還時槍兄虬爲祕書丞弟慶爲尙書左丞槍曰兄則職與簡牘褒貶人倫弟則管轄都司股肱朝廷可謂榮寵矣然而四方未靜車嘗不一槍唯當蒙矢石履危難以報國恩耳頃之周文謂槍曰九曲國之東鄙勞君守之遂鎮九曲尋從王雄討上津魏興平之除魏興華陽二郡守安康人黃眾

寶將圍州城先圍檜郡城卑下士眾寡弱又無守禦之備
連戰十餘日士卒僅存城陷身被十餘創遂爲賊所獲既而
眾寶進圍東梁州縛檜置城下欲令誘城檜大呼曰羣賊烏
合糧食已罄行卽退散各宜勉之眾寶臨檜以兵曰速更汝
辭不爾便就戮檜守節不變遂害之棄尸水中城中人皆爲
流涕後兒子止戈收檜尸還長安贈東梁州刺史子斌字伯
遠年十七爲齊公憲記室早卒

以州

賀拔勝字破胡神武尖山人度拔次子也少有志操善左右
馳射北邊莫不推其膽畧衛可瓌圍懷朔勝時亦爲軍主從
度拔鎮守旣被圍經年而外援不至勝慷慨白鎮將楊鈞請
告急於大軍乃募勇敢少年得十餘騎夜潰圍出賊追及之
勝曰我賀拔破胡也賊不敢逼至朔州見臨淮王彧詞義懇

至或許出師還復攻圍而入賊追之射殺數人至城下大呼曰賀拔破胡與官軍至矣城中納之鈞復遣勝出覘武川武川已陷勝馳還懷朔亦潰父子遂爲賊所虜尋而襲殺可瓌眾令勝馳告朔州未反而度拔卒刺史費穆奇勝才畧厚禮留之參以兵事時廣陽王深在五原召爲軍主以功拜統軍又隸僕射元纂鎮恒州會朔州流人南下恒州城人應之勝與兄允弟岳相失勝南投肆州允岳投尔朱榮榮攻陷肆州得勝大悅曰吾得卿兄弟天下不足定勝兄弟三人遂事榮時杜洛周據幽定葛榮據冀瀛榮曰井陘險要我之東門欲屈君鎮之如何勝曰是所願也榮乃表勝鎮井陘榮入洛封易陽縣伯後與元天穆北征葛榮大破之洛周餘燼韓樓據薊城復以勝爲大都督鎮中山樓馨勝威名不敢南寇元顥

入洛榮徵勝使與余朱兆自硤石度大破顛軍擒其子冠受
遂前驅入洛進爵真定縣公及榮死田怡等議攻宮殿門勝
止之曰吾眾旅不多何輕爾怡乃止隨世隆至河橋遂勒所
部還莊帝大悅仲遠逼京都假驃騎大將軍征東都督率騎
一千會鄭先護討之先護置之營外人馬未得息俄而仲遠
兵至戰不利乃降節閔帝拜右衛將軍後從余朱度律拒齊
神武度律與兆不平勝與斛斯椿詣兆營和之反爲兆所執
兆數之曰爾殺可瓌罪一也天柱薨後不與世隆等俱來而
東征仲遠罪二也我欲殺爾久矣勝曰可瓌作逆勝父子誅
之其功不小反以爲罪天柱被戮以君誅臣勝甯負王不負
朝廷今日生死在王但去賊密邇內媾嫌隙自古迄今未有
不破亡者勝不憚死恐王失策兆乃捨之韓陵之役兆率鐵

騎陷陣出齊神武後度律懼兆陵已勒兵不進勝以其攜貳
遂以麾下降齊神武兆軍遂大敗太昌初爲領軍將軍尋除
侍中孝武帝將圖齊神武拜都督荊州刺史驃騎大將軍關
府儀同三司南道大行臺尙書左僕射勝多所克捷沔北盩
爲邱墟梁武帝敕其子雍州刺史續曰賀拔勝北間驍將爾
宜慎之勿與爭鋒續遂城守不敢出尋進位尙書令進爵琅
邪郡公孝武帝詔引兵赴洛至廣州而帝已入關勝還軍南
陽令府長史元穎行州事自率所部將西赴關中進至浙陽
授太保錄尙書事聞齊神武已平潼關乃還荊州州人鄧誕
執元穎齊神武遣行臺侯景大都督高敖曹赴之勝敗中流
矢奔梁在南三年梁武帝遇之甚厚勝求還梁武帝親餞于
南苑勝自是執弓矢見鳥獸南向者皆不射之旣至長安詣

關謝罪魏帝握勝手獻獻久之曰初平西徙永嘉南渡漢晉皆爾事乃關天非公之咎也授太師從周文帝擒竇泰于小關攻宏農下河北擒郡守孫晏破東魏軍于沙苑追至河上與李弼別攻河東略定汾絳河橋之役勝大破東魏軍收其降卒而還及齊神武攻玉壁勝以前軍大都督從周文見齊神武旗鼓識之募敢勇三千人配勝以犯其軍勝適與神武遇連叱而字之曰賀六渾賀拔破胡必殺汝也持稍追神武數里刃垂及之神武汗流氣殆盡會勝馬爲流矢所中死副騎至神武已逸去勝歎曰今日吾不執弓矢天也是歲勝諸子在東者皆爲神武所害勝憤恨大統十年卒臨終手書與周文曰勝萬里杖策歸身闕廷冀望與公掃除逋寇不幸殞斃微志不申若死而有知猶望魂飛賊庭以報國恩遇爾周

文覽書流涕久之勝尤工武藝走馬射飛鳥十中五六周文
每云諸將對敵神色皆動唯賀拔臨陣如平常真大勇也自
居重任始愛墳籍招文儒討論性又通率重義輕財卒後唯
有隨身兵仗及書千卷而已初勝至關中自以年位素重見
周文不拜後從宴昆明池時有雙鳧遊池中周文授弓矢于
勝曰不見公射久矣請以爲歡勝射之一發俱中因拜曰使
勝得奉神武以討不庭皆如此也周文悅恩禮日重勝亦盡
誠推奉焉贈太宰錄尚書事謚曰貞獻明帝二年配饗文帝
廟廷無子以弟岳子仲華嗣位開府儀同三司襲爵琅邪公
大象末位江陵總管

雷紹字道宗武川鎮人有膂力善騎射年十八給事鎮府使
洛陽見京都禮儀之美還謂同輩曰徒知邊備尙武以圖富

貴不謂文學身之寶也。生世不學，其猶穴處何所見焉。遂辭母求師。經年通孝經論語，嘗讀書至人行，莫大於孝。投卷歎曰：吾離違侍養，非人子之道。卽還鄉里，躬耕奉養，以母憂哀毀骨立。由是知名，召補鎮佐。後爲賀拔岳長史。岳有大事，嘗訪而後行。紹勸迎孝武西都，長安後岳欲保關中，坐觀成敗。紹知計不用，請任邊州，遂爲京兆太守。清平理物，甚得人和。及岳遭侯莫陳悅之難，紹棄郡馳赴岳軍，與寇洛等迎周文帝。悅平，以功授大都督、涼州刺史。永熙三年，爲渭州刺史。進爵昌國伯。周文以恩舊接之，卒於州。紹性好施祿，賜皆分贖親故。及卒，無以送終，還葬長安。文帝素服臨弔，贈太尉，賜東園祕器。子煥。

宇文劄，字樂仁，代武川人。驍悍有膽略，累著戰功，封南安縣

侯孝武西遷以獨孤信爲行臺信引爲帳內都督破田八能及禽東魏荊州刺史辛纂虬居多尋隨信奔梁大統三年歸關進爵公擒寶泰復宏農及沙苑河橋之戰皆有功及從信討梁企定破之累遷南秦州刺史驍騎大將軍開府儀同三司虬每經行陣必身先卒伍故上下同心戰無不克後除金州刺史大將軍卒

王德字天恩代武川人少善騎射以孝弟稱初從平元顯賜爵同官縣子又從平万俟醜奴別封深澤縣男與寇洛等翊戴周文除平涼郡守德雖不知書至於斷決處分良無以過涇州所部五郡德常爲最孝武西遷進下博縣伯行東雍州事在州未幾百姓懷之賜姓烏丸氏大統元年進爵公加車騎大將軍遷儀同三司北雍州刺史後累有戰功加開府侍

中進河間郡公拜河州刺史羣羌率服後卒於涇州刺史謚曰獻德性厚重廉慎言行無擇母幾年百歲後德終子慶嗣性謹厚位開府儀同三司初德喪父貧無以葬賣子公奴并一女以營葬事旋遭兵亂及在平涼始得之遂名曰慶

王勇代武川人本名胡仁少雄健有膽決數從侯莫陳悅賀拔岳征討功居多拜別將周文爲丞相封包信縣子從擒寶泰復宏農戰沙苑氣蓋眾軍所當必破周文歎其勇敢賞賜特隆進爵公邙山之戰率敢死之士三百人並執短兵大呼直進出入衝擊殺傷甚多敵無敢當者時大軍不利唯胡仁及王文達耿令貴三人力戰軍還皆拜上州刺史令探籌取之胡仁遂得雍州賜名勇進侍中驃騎大將軍開府儀同三司恭帝元年從征蠕蠕破之進新陽郡公賜姓庫汗氏又別

封永固縣伯特請迴授兄子興時人義之尋進大將軍卒子昌嗣官至大將軍

若干惠字惠保代武川人父樹利周從魏廣陽王深征葛榮戰沒贈冀州刺史惠以別將從賀拔岳以功封北平縣男與寇洛趙貴翊戴周文仍從平侯莫陳悅拜直閣將軍從擒竇泰復宏農破沙苑每先登陷陣加侍中開府儀同三司封長樂郡公大統四年從魏文帝東巡洛陽與齊神武戰於河橋力戰破之七年遷領軍高仲密來附周文軍至洛陽齊神武屯於芒山惠爲右軍與中軍破之齊兵乃萃右軍軍將趙貴等戰不利會日暮齊兵攻惠惠擊皆披靡至夜中騎復來追惠惠徐下馬顧命廚人營食食訖謂左右曰長安死此中死異乎乃建旗鳴角收軍而還齊追騎憚惠疑有伏兵不敢逼

至宏農見周文獻敎不自勝周文壯之遷司空惠性剛質有
勇力撫御將士莫不懷恩侯景內附鎮魯陽卒於軍惠於諸
將年最少事母孝周文嘗造射堂新成與諸將宴射惠竊歎
曰親老矣何時辨此周文卽曰徙堂於惠宅其見重如此及
卒爲流涕喪至又臨撫焉加贈秦州刺史謚曰武烈子鳳字
遠摩有識度襲長樂郡公尙周文女位開府儀同三司大駟
中大夫後錄惠功封徐國公拜柱國

趙善字僧慶代武川人貴從祖兄也少好學美容儀沈毅有
遠量尔朱天光討邢杲万俟醜奴以爲長史普泰初爲大行
臺尙書封山北縣伯天光敗死善請收葬神武義而許之賀
拔岳總關中迎善爲長史後乃從周文孝武帝西遷改封襄
城縣伯厯尙書左右僕射進爵爲公善性温恭有器局位居

端右而愈自謙退時人稱其有公輔量大統九年從戰芒山
爲敵所獲卒於東魏建德初子詢表請贈諡詔贈大將軍大
都督四川諸軍事岐州刺史諡曰敬

王盟字侔其先樂浪人六世祖波前燕太宰祖珍魏黃門侍
郎贈并州刺史樂浪公父羅伏波將軍以良家子鎮武川因
家焉正光中破六韓拔陵攻陷諸鎮爲所擁後流寓中山以
積射將軍從蕭寶夤西征隨賀拔岳禽万俟醜奴平秦隴常
先登力戰周文平侯莫陳悅除原州刺史孝武至長安封魏
昌縣公大統三年徵拜司空轉司徒文帝東征以留後大都
督行雍州事節度關中諸軍趙青雀之亂輔太子出頓渭北
事平進長樂郡公賜姓拓跋氏遷太保九年進位太傅加開
府儀同三司盟姿度宏雅仁而汎愛雖居師傅而謙恭自處

未嘗以勢位驕人及疾上數幸其第親問所欲十一年薨贈
本官謚曰孝定

王勒字醜與盟子忠果有材幹年十七從周文入關平秦隴
定關中周文嘗謂曰爲將坐見成敗者上也披堅執銳者次
也勒曰意欲兼之周文大笑拜散騎常侍賜爵梁甫縣公大
統初爲千牛備身直長領左右出入臥內小心謹厚文帝嘗
曰王勒可謂不二心臣也沙苑之役勒以都督領禁兵居左
翼被傷重卒於行間周文深悼贈使持節太尉尙書令十州
諸軍事雍州刺史追封咸陽郡公謚曰忠武子弼襲爵尙魏
安樂公主位大都督通直散騎常侍勒弟懋字小興盟之西
征也懋幼留山東永安中始入關遂從征伐大統初賜爵安
平縣子進爵爲公遷右衛將軍盟卒懋上表辭位乞終喪制

帝不許累遷開府儀同三司侍中左衛將軍領軍將軍溫
敬儼官行十餘年未嘗有過廢帝二年除南岐州刺史賜爵
安甯郡公拜小司寇卒官子悅嗣位大將軍同州刺史改封
濟南郡公

梁禦字善通其先安定人因官北邊遂家武川改姓紇豆陵
氏高祖俟力提從魏太武征討位揚武將軍定陽侯禦少好
學進趨詳雅長好弓馬尔朱天光西討引爲左右平關隴除
益州刺史第一領人酋長封白水縣侯從賀拔岳鎮長安岳
被害胡載周文秦隴平欲引兵東下雍州刺史賈顯持兩端
以禦爲大都督雍州刺史領前軍先行說顯出迎遂入鎮大
統元年進爵信都縣公授尚書右僕射從復宏農破沙苑加
侍中開府儀同三司進爵廣平郡公出爲東雍州刺史爲政

舉大綱而已人庶稱之臨卒唯以國步未康爲恨言不及家贈太尉尙書令雍州刺史謚曰武昭子睿

寇洛上谷昌平人父延壽魏和平中以良家子鎮武川因家焉洛性明辯不拘小節賀拔岳西征從入關以功封安鄉縣子岳爲大行臺以洛爲右都督侯莫陳悅旣害岳洛素爲眾信乃收集將士志在復讐至原州推洛爲盟主周文至以洛爲都督從討侯莫陳悅平之拜涇州刺史大統初詔加開府進爵京兆郡公封洛母宋爲襄城郡君四年鎮東雍州五年卒於鎮贈太尉尙書令謚曰武子和嗣周明帝二年詔洛配享文帝廟庭賜和姓若引氏改封松陽郡公

念賢字蓋盧金城抱罕人父求就以大家子戍武川鎮仍家焉賢美容質頗涉經史兒時在學中讀書有善相者諸生競

詣之賢獨不往笑謂諸生曰男兒死生富貴皆在天也何遽相乎遭父憂居喪有孝稱後以破衛可瓌功除別將又以軍功封屯留縣伯從弟朱榮入洛兼尚書右僕射東道行臺進爵平恩縣公永熙中孝武以賢爲中軍北向大都督進爵安定郡公加侍中開府儀同三司大統初拜大尉爲秦州刺史加太傅給後部鼓吹三年轉太師都督河州刺史大將軍久之還朝兼錄尚書事後與廐陵王欣扶風王季等同爲正直侍中時行殿初成未有題目帝詔近侍各名之莫允帝心賢乃以圖極對帝笑曰正與朕意同河橋之役賢不力戰名頗減五年除都督秦州刺史薨於州謚曰昭定賢於諸公皆爲父黨自周文以下咸拜敬之子華性和厚有長者風官至開府儀同三司合州刺史

耿豪鉅鹿人本名令貴其先家於武川少癯獷有武藝好以氣陵人賀拔岳西征引爲帳內歸周文以武勇見知豪亦自謂所事得主從討侯莫陳悅及迎孝武錄前後功封平原子沙苑之戰血染甲裳盡赤周文歎曰令貴武勇所向無前觀其甲裳足以爲驗不須更論級數也進爵爲公芒山之戰豪謂所部曰大丈夫除賊須右手拔刀左手把稍直斫直刺慎莫皺眉畏死遂大呼獨入敵人鋒刃亂下當時咸謂豪沒俄然奮刀而還戰數合當豪前者死傷相繼又謂左右曰吾豈樂殺人壯士除賊不得不爾拜北雍州刺史賜姓和稽氏進位侍中驃騎大將軍開府儀同三司豪性悍言多不遜周文惜其驍勇每優容之豪亦自謂意氣冠羣終無所屈年四十五卒周文痛惜之子雄嗣位至大將軍

以上歸化城廳

乙弗朗字通照其先東部人世爲部落大人與魏徙代後因家盛樂焉朗少有俠氣以善騎射稱孝莊末北邊擾亂避居并肆間尔朱榮見而重之以功封連勺子隸賀拔岳爲左廂都督孝武禦齊神武授朗閣內大都督帝西入詔爲軍司先驅靖路至長安封長安縣公卒於岐州刺史初朗患積冷周文使人問疾朝夕相繼臨終惟云恨不見河洛清平重反京縣以此爲恨子鳳嗣仕周官至宮伯開府儀同三司與周閔帝謀宇文護見殺

和林格爾廳

右西魏二十五人

案諸人雖回事宇文而未預禪代舊志並列入北周殊無限斷

茲以東西魏分著凡委身不終於一姓者皆別入仕實錄

堯雄字休武上黨長子人暄之子少驍果輕財重氣位燕州刺史平城縣伯率所部據定州歸齊神武從兄傑爲滄州刺

史亦遣使降神武使傑行瀛州事使雄代傑爲瀛州刺史廷
爵公義然後取接下以恩吏人懷之爲大都督隨高昂破賀
拔勝於穰城除豫州刺史趙繼宗殺潁川太守邵招據樂口
北應元洪威雄討之繼宗敗走城內因雄之出據州引西魏
復討平之梁將李洪芝王當伯襲破平鄉城雄並擒之又破
梁司州刺史陳慶之圍南荊州陷其城元慶和侵擾南境大
破之於南頓尋破梁楚城豫州人上書更乞雄爲刺史復行
豫州事行臺任祥攻潁川長史賀若紇爲西魏將怡峯所敗
雄收散卒保大梁周將韋孝寬攻豫州雄都督程多寶執刺
史馮邕并雄家屬及部下妻子數千口送至樂口雄外兵參
軍王恆伽都督赫連儁等從大梁邀之斬多寶收雄家口還
雄圍破樂口進討懸瓠復行豫州事岳寶據項城韓顯據南

頓雄一日拔其二城擒顯及長史岳寶遁走加驃騎大將軍儀同三司復平魯陽除豫州刺史雄性質寬厚爲政舉大綱在邊十年屢有功績愛人物多所施與入以此稱之興和四年卒贈司徒諡武恭子師嗣

李業與上黨長子人祖蚪父元紀以儒學舉孝廉元紀卒於金鄉令業與少志學師事徐遵明時漁陽鮮于靈馥亦聚徒教授而遵明著錄尙寡業與詣靈馥費舍類受業靈馥曰李生外蓬莖博士何所得也業與不言及靈馥說左傳業興問去業數條靈馥不能對乃振衣而起曰羌弟子正如此耳徑還自此靈馥生徒傾學就遵明學徒大盛業興之爲也後乃博涉百家圖緯風角天文占候無不討論尤長算歷雅自矜負禮待不足雖權貴不屈後爲王遵業門客舉孝廉爲校書

郎以世行趙匪歷節氣後辰下算延昌中乃爲戊子元歷上之時屯騎校尉張洪盪寇將軍張龍詳等九家各獻新歷宣武詔共爲一歷洪等推業興爲主成戊子歷正光三年奏行之業興以殷歷甲寅黃帝辛卯徒有積元術數亡缺又修之各爲一卷傳於世建義初典儀注尋除著作郎永安三年以前造歷勳賜爵長子伯孝武帝初封屯留縣子除通直散騎常侍後入爲侍讀遷鄴起部郎中辛術奏曰今皇居徙御百度創始營構一興必宜中制李業興碩學通儒博聞多識萬門千戶所宜詢訪今求就之披圖按記考定是非參古雜今折中爲制詔從之尙書右僕射營構大匠高隆之纂修三署樂器衣服又奏請共事天平四年與李諧盧元明使梁梁敬騎常侍朱异問曰魏洛中委粟山是南郊邪圓邱邪曰委粟

是圓邱非南郊異曰郊邱異所是用鄭義我此中用王義曰然洛京郊邱用鄭解異曰若然女子逆降傍親亦從鄭否曰此亦不專從若此間用王義除禫應用二十五月何以王儉喪禮禫用二十七月也異不答業興曰我昨見明堂四柱方屋都無九五之室當是裴頠所制明堂上圓下方裴唯除室耳今此上不圓何也異曰方圓俗說經典無文曰圓方之旨出處甚明卿不自見見卿錄梁主孝經義亦云上圓下方豈非自相矛盾異曰若然圓方竟出何經業興曰出孝經援神契異曰緯侯何可信也業興曰靈威仰叶光紀之類經典亦無所出卿復信不異不答梁武問詩周南王者之風繫之周公召南仁賢之風繫之召公何名爲繫對曰鄭注儀禮云昔太王王季居於岐陽躬行召南之教以興王業及文王行今

周南之教以受命作邑於鄧文王爲諸侯之地所化之國今
既登九五之尊不可復守諸侯之地故分封二公名爲繫梁
武又問尙書正月上日受終於文祖此時何正對曰夏正月
梁武言何以得知對曰按尙書中候運衡篇日月營始故知
夏正又問堯時以前何月爲正對曰自堯以上書典不載實
所不知梁武又云寅賓出日是正月日中星鳥以殷仲春卽
是二月何得云不知對曰雖三正不同言時節者皆據夏時
正月周禮仲春二月會男女之無夫家者雖自周書月亦夏
時堯之日月亦當如此又問易有太極極是有無對曰所傳
太極是有還遷散騎常侍加中軍大將軍武定元年除國子
祭酒仍侍讀神武以業興明術數軍行常問焉芒山之役有
風從西來入營業興曰小人風來當大勝神武曰若勝以爾

爲本州刺史既而爲太原太守五年齊文襄引爲中外府諮議參軍造九宮行基厯以五百爲章四千四十爲部九百八十七爲斗分還以巳未爲元始終相維不復移轉與今厯法術不同至於氣序交分景度盈縮不異也文襄征潁川業興曰往必克克後凶文襄旣克欲以業興當凶而殺之業興鳩集文籍手自補修題帖家書垂將萬卷覽讀不息多有異聞諸儒服其深博性豪俠重意氣急難歸之便畧匿好合傾身無怪乖忤便卽疵毀時人以此疾之至於學術精微當時莫及二子崇祖傳父業

李崇祖字子述業與子盧景裕講易崇祖時年十一論難往復景裕憚之姚文安難服虔左傳解七十七條名曰駁妄崇祖申明服氏名曰釋謬營三臺有勞封屯留縣侯武定中大

尉外兵參軍

以上器
安府

婁昭字菩薩代郡平城人齊神武后之母弟也祖提雄傑有
識度家僮千數牛馬以谷量性好周給士多歸附之魏太武
時以功封真定侯父內干有武力未仕而卒昭貴贈司徒昭
方雅正直有大度深謀腰帶八尺弓馬冠時神武少親重之
昭亦早識人雄曲盡禮敬數隨獵每言不宜乘危歷險神武
將出信都昭贊成大策爲中軍大都督從破尔朱兆於廣阿
封安喜伯改濟北公又徙濮陽郡公授領軍將軍斛斯椿賀
拔勝構間以疾辭還晉陽後從入洛兗州刺史樊子鶴據城
昭爲東道大都督伐之子鶴平諸將勸盡捕誅其黨昭曰此
州無狀橫被殘賊其賊是怨其人何罪遂皆舍焉後轉大司
馬仍領軍遷司徒出爲定州刺史事委寮屬舉其大綱而已

卒於州贈假黃鉞太師太尉諡曰武齊初祭告其墓封太原
王皇建初配享神武廟庭長子仲達嗣改封濮陽王次子定
遠少歷顯職別封臨淮郡王武成末受顧命位司空趙郡王
奏黜和士開定遠納士開賂遂成趙郡之禍尋除瀛州刺史
與穆提婆有隙以高思好事遇禍

張華原字國滿代郡人少明敏有器度初爲齊神武驃騎府
法曹參軍賜爵新城伯累遷大丞相府屬深被親待恆令宣
諭意旨除散騎常侍周文據雍州神武使華原入關說焉周
文謂曰若能屈驥足於此當共享富貴不爾命懸今日華原
曰殞首而已不敢聞命周文嘉其亮正乃使東還尋悔遣追
不及神武以華原久不返每嘆惜之聞其來喜見於色除相
府右長史遷驃騎大將軍特進進爵爲公仍徙封新安後爲

兗州刺史華原有幹略達政體至州廣布耳目以威禁境內
大賊及隣州亡命三百餘人詣華原歸款撫以恩信放歸田
里人懷感附寇盜寢息州獄先有繫囚千餘人華原科簡輕
重隨事決遣至年暮惟有重罪者數十人谷給假五日日期
盡速還囚等曰有君如是何忍背之依期畢至州境數有猛
獸爲暴華原臨政州東北七十里輒山中忽有六駁食猛獸
咸以爲化感所致卒官州人大小莫不號慕爲樹碑立祠四
時祭焉贈司空公尙書右僕射子宰均嗣

張瓊字德連代人少壯健有武用爲余朱榮都督歷濟州刺
史後歸神武拜滄州刺史加驃騎大將軍開府儀同三司天
平中神武襲克夏州以瓊爲慰勞大使留鎮之尋爲周所陷
卒贈司徒都督恆州刺史二子長欣次道業欣尙魏平陽公

主除駙馬都尉驃騎大將軍開府儀同三司建州刺史南鄭伯瓊常憂其大盛曰凡人官爵莫若處中欣位秩太高深爲憂慮欣尋爲孝武所害時人稱瓊先見遵業討元顯有功封固安縣開國子歷安西將軍建州刺史武定中隨儀同劉豐討侯景爲景所禽景敗殺遵業於渦陽

陸子彰字明遠本名士沈代人希道子希道從弟昕之尙獻文常山公主歷充青二州刺史並有政績轉相州刺史卒無子以子彰爲後年十六事公主盡禮正光初襲東郡公累遷給事黃門侍郎娶咸陽王禧女嘗養於彭城王第莊帝親之同諸姊建義初封濮陽郡王尋復先爵天平中拜衛將軍潁州刺史母憂去職元象中除齊州刺史又加驃騎將軍行懷州事轉北豫州刺史仍除徐州一年歷三州當世榮之還朝

除衛大將軍右光祿大夫行瀛州事尋拜侍中復行滄州事
進號驃騎大將軍行冀州事除侍讀兼七兵尚書行青州事
子彰自蒞瀛州後有政聲加以虛已納物人士愛之除中書
監卒贈開府儀同三司謚文宣子彰好道術不忍用桑螵蛸
子合藥訓六子有法度

慕容紹宗字紹宗代人前燕太原王恪之後也會祖騰歸魏
遂居代祖郁岐州刺史父遠恆州刺史紹宗容貌恢毅少言
深沈有膽略尔朱榮卽其從舅子也榮欲悉誅洛中人士對
曰公旣執忠義忽欲殲夷多士實謂非策榮不從後以軍功
封索盧侯遷尔朱兆長史及兆敗紹宗於烏突城攜尔朱榮
妻子并兆餘眾自歸神武加恩禮官爵如故軍謀兵略時參
預焉及遷鄴令紹宗知府庫圖籍諸事累遷青州刺史丞相

記室孫舉譜之徵還元象初以軍功進爵公累遷御史中尉
梁劉烏黑入寇徐方授徐州刺史執烏黑殺之遷除尚書左
僕射侯景反命紹宗爲東南道行臺加開府改封燕郡公擒
梁貞陽侯蕭明於寒山回軍討侯景於渦陽時景軍甚盛初
聞韓軌往討之曰噉豬腸小兒聞高岳往曰此兵精人凡爾
諸將被輕及聞紹宗至扣鞍曰誰教鮮卑小兒解遣紹宗來
若然高王未死邪及與景戰諸將頻敗無肯先者紹宗麾兵
徑進諸將從之因大捷西魏遣王思政據潁川又以紹宗爲
南道行臺堰洧水灌城與劉豐臨堰見北有塵氣乃入艦同
坐暴風從東北來纜斷飄艦徑向敵城紹宗自度不免投水
卒三軍將士莫不悲惋朝廷嗟傷焉贈太尉諡曰景惠齊皇
建初祀享文襄廟庭以上大

同府

高市貴善無人也少有武用孝昌初恆州內都督劉喻等聚眾反市貴爲都督率眾討破之累遷撫軍將軍諫議大夫
尔朱榮立莊帝預翼戴之勳遷衛將軍光祿大夫賜爵上洛
縣伯榮擊葛榮於滏口以市貴爲先鋒都督葛榮平除使持
節汾州刺史紇豆陵步藩之侵亂并州也齊神武破之市貴
亦從行有功封常山郡公神武起義市貴預其謀天平初復
除晉州刺史尋以洪洞要隘道市貴鎮之神武沙苑失利晉
州行事封祖業棄城而還州民柴覽作逆市貴破斬之於柴
壁是時東雍南汾二州境多聚爲盜因市貴平覽皆散歸後
業後秀容人五千戶叛應山胡復以市貴爲行臺統諸軍討
平之元象中從神武破周文帝於邠山重除晉州刺史西道
軍司率眾擊懷州逆賊潘集未至遇疾道卒

朔平府

賀拔允神武尖山人度拔次子也便弓馬有膽略度拔沒允兄弟俱奔恆州刺史廣陽王深深敗歸尔朱榮榮素聞其名待之甚厚建義初封壽陽縣侯永安中進爵公長廣王除開府儀同三司封燕郡王兼侍中使蠕蠕遣至晉陽屬齊神武出山東允早自結託神武以其北土之望尤親禮之遂與允出信都中興初轉司徒領尙書令入洛進爵王轉太尉加侍中孝武以允弟岳據關中有重兵深相委託潛使來往及岳沒又委岳兄勝心腹之寄神武重舊猶全護焉天平元年獄或告允引弓擬神武乃餓殺之年四十八神武親臨哭贈太保允三子世文世樂難隨興和末神武並召與諸子同學焉

武定中敕居定州賜田宅

清水河廳

蔡儁廣甯石門人父普守五原有功拜甯朔將軍卒贈燕州

刺史儁豪爽有膽略齊神武微時深相親附神武謀誅杜洛周偁預其計事泄歸尔朱榮從入洛又從破葛榮平元顥封烏洛縣男隨神武舉義平鄴破韓陵並有戰功進爵侯出爲齊州刺史爲政嚴暴然亦明解吏人畏服之性好賓客頗稱施惠天平中卒於揚州刺史贈尚書令司空公諡威武齊初祭其墓皇建初配享神武廟庭

韓賢字普賢廣甯石門人壯健有武勇爲尔朱度律帳內都督封汾陽縣伯後爲廣州刺史及齊神武起義度律以賢素爲神武所知遣使徵之賢不願去乃密遣羣蠻多舉烽火若有寇至使者遂爲敗得停賢仍潛通誠於神武後拜建州刺史天平初歷洛州刺史州民韓木蘭等作逆賢擊破之親自案檢收甲仗有一賊窟迫藏於死尸之間忽起斫賢卒贈尚

書令司空子裔嗣

任祥字延敬廣甯人伯父桃太和初爲雲中軍將祥隨之因家焉少和厚有器度初從葛榮榮敗先降拜廣甯太守賜爵西河縣公隨齊神武起兵封魏郡公後兼尙書左僕射進開府儀同三司位望既重能以寬和接物人士稱之及斛斯椿變發乘宮歸神武天平初拜侍中遷徐州刺史梁遣將寇邊祥破於北濟陰又破之單父在州爲政不殘禮敬人士不爲民所疾苦潁川長史賀若微附西魏祥戰失利還與侯景高昂共攻拔潁川元象元年卒贈太尉公錄尙書事于胄天平中爲東郡太守興和末預尔朱文暢謀誅

以上薩拉齊廳

莫多婁貸文太安狄那人驍果有膽氣從神武起兵破廣阿封石城縣子從破韓陵進侯爵從平赤嶺獲爾朱兆尸天

平中進爵公晉州刺史元象初除車騎大將軍儀同三司南道大都督從攻獨孤信於金墉城請率所部擊其前鋒以輕騎一千軍前斥埃死於周軍贈尚書左僕射司徒公子敬顯嗣彊直勤幹少以武力見知恆從斛律光征討數有戰功位至開府儀同三司武平七年推立安德王稱尊號安德敗武將唯敬顯走還鄴授司徒周武帝平鄴斬於闔闔門外責其不留晉陽也

尉長命太安狄那人父顯魏代郡太守長命性和厚有器識扶陽之亂寄居太原參預齊神武起兵破韓陵拜安南將軍除東南道大都督平樊子鵠徙幽州刺史督安平二州州居北垂土荒民散長命以恩撫之少得安集卒贈司空謚武壯子興敬便弓馬有武藝位冠軍將軍賜爵集中縣伯進侯邨

山之役因戰爲流矢所中卒贈涇岐隴三州軍事爵爲公諡
閔莊神武哀惜之親臨弔焉子士林嗣

賈泰字世甯太安捍殊人本出清河觀津曾祖羅魏統萬鎮
將因居北邊父樂魏末拔陵爲亂與鎮將楊鈞固守遇害追
贈司徒泰善騎射有勇略父兄戰歿於鎮身負骸骨歸尔朱
榮從討邢杲賜爵廣阿子神武爲晉州請爲鎮城都督參謀
軍事累遷侍中京畿大都督尋領御史中尉泰以勳戚居臺
百寮憚之天平三年神武西伐令泰自潼關入四年泰至小
關爲周文帝所襲殺盡沒泰自殺贈大司馬太尉錄尚書事
諡武貞泰妻婁后妹雖以親見待而功名自建齊初祭其墓
皇建初贈享神武廟庭子孝嗣

段榮字子茂祖士信仕沮渠氏後入魏以豪族徙北邊家於

五原郡父連安北府司馬榮少好厭術專意星象正光初語人曰天垂象見吉凶今觀元象察人事不及十年當有亂矣或問曰起於何處當可避乎榮曰構亂之原此地爲始恐天下因此橫流無所避也未幾果如言榮遇亂與鄉舊攜妻子南趣平城屬杜洛周爲亂與齊神武謀誅之事不捷共奔尔朱榮後神武建義山東榮贊成大策爲行臺右丞西北道慰諭大使巡方曉諭所在下之神武南討鄴留榮鎮信都所須軍資榮轉輸無闕神武入洛論功封姑臧侯轉授瀛州刺史榮妻裴后姊也榮恐神武招私親之議固推諸將竟不之州尋行相州事後爲濟州刺史天平三年轉行恭州事榮性温和所歷皆推仁恕民吏愛之初神武將圖關右與榮密謀榮盛稱未可及渭曲失利神武悔之曰吾不用段榮之言以至

於此四年除山東大行臺大都督甚得物情大象元年授儀
同三司二年五月卒贈太尉尚書右僕射謚曰昭子韶字孝
先位至左丞相永昌郡公爲齊名將

万俟洛字受洛干太平人其先匈奴之別種也父普降魏授
後將軍第二領人酋長齊神武起義普通誠款神武平夏州
乃率其部落來奔授西河公累遷太尉朔州刺史洛豪壯有
武藝騎射過人爲鄉閭所伏破六韓拔陵反隨父歸順除顯
武將軍隨尔朱榮每有戰功累遷汾州刺史及起義信都遠
送誠款神武嘉其父子俱至甚優其禮除領軍兼靈州刺史
天平中隨父東歸封建昌郡公與諸將軍圍獨孤如願於金
墉及河陰之戰並有功神武嘉其父尊老将崇禮之嘗親扶
上馬洛免冠稽首曰願出死力以報深恩及此役也請軍北

渡橋洛一軍不動謂西人曰万俟受洛干在此能來可來也西人畏而去神武以雄壯名其所營地爲回洛城洛慷慨有氣節勇銳冠時當世推爲名將興和初卒

破六韓常字保年附化人父孔雀領民酋長常沈敏有膽略善騎射齊神武起義常爲附化守與万俟受洛干東歸神武嘉之上爲撫軍與諸將征討從神武攻擊諸寇累遷車騎大將軍開府封平陽公除洛州刺史常啟世宗曰常自鎮河陽以來頻出關口太谷二道北制已北洛州已南所有要害頗所悉知而太谷南口去荆路踰一百經赤土阪是賊往還東西大道中間曠絕一百五十里賊之糧餽唯經此路愚謂於彼選形勢之處營築成戍安置士馬截其遠還自然不能更有行送世宗納其計遣大司馬斛律金築楊志百家呼延三

鎮常秩滿還晉陽拜太保倉州刺史卒贈尙書令司徒公太
傅第一領民酋長假王諡曰忠武

以上烏拉特蒙古部

右東魏十九人

例同西魏案神武屬南太安太平

五原郡地魏所建懷朔鎮也

志並屬朔州木漢

舊志人物繫之今朔州非

白建字彥舉太原陽邑人初入大丞相府任騎兵曹典文帳
明解書計爲同局所推天保末兼中書舍人孝昭輔政除大
丞相騎兵參軍河清二年除員外散騎常侍仍舍人三年突
厥入境代忻二牧悉細馬合數萬匹在五臺山北柏谷中避
賊賊退敕建送馬定州建以馬瘦還敕以便宜從事戎馬無
損建有力焉武平末歷尙書特進侍中中書令封高昌郡公
父長命贈開府儀同三司都官尙書建勤於在公以溫柔自
處與唐邕俱以典執兵馬致位卿相世稱唐白諸子俱爲州

主簿卒贈司空

王松年太原晉陽人魏侍中遵業子也少知名齊文襄臨并州辟主簿累遷通直散騎常侍副李緯使梁歷位尚書郎中魏收撰魏書松年有謗言文宣怒禁止之仍加杖罰歲餘得免除臨煒令遷司馬別駕本州大中正孝昭擢拜給事黃門侍郎每賜坐與論政事甚善之後馳驛至鄴宣遣詔發言涕泗迄於宣罷容色無改辭吐諧韻宣訖號慟自絕於地百官莫不感動還晉陽兼侍中護梓宮還鄴諸舊臣避形迹無敢盡哀惟松年哭必流涕武成亦雅重之加散騎常侍食高邑縣幹參定律令前後大獄多委焉兼御史中丞卒贈吏部尚書并州刺史諡曰平第二子劼最知名

斛律金字阿六敦朔州敕勒部人家晉陽

祖倍侯利魏道

武時內附位大羽真賜爵孟都公祖幡地斤殿中尙書父那
瓌光祿大夫贈司空金性敦直善騎射行兵用匈奴法望塵
知馬步多少嗅地知軍度遠近爲軍主破六韓拔陵之亂統
所部詣雲州除第二領人酋長稍引南出黃瓜堆爲杜洛周
所破與兄平歸尔朱榮爲別將孝莊立賜爵阜城男位金紫
光祿大夫贊成齊神武大謀大昌初爲汾州刺史進侯從破
竒豆陵於河西沙苑之役神武以地阨少却軍爲西師所乘
遂亂張華原黠兵莫有應者神武將集兵便戰金曰眾散將
離其勢不可復用宜急向河東神武據鞍未動金以鞭拂馬
神武乃還是役也無金先請還幾殆高仲密叛金從破周文
於洛陽遷除大司馬改封石城郡公神武重其古質每誠文
襄曰有讒此人者勿信之文襄嗣事爲肆州刺史文宣初封

咸陽郡王天保三年就除太師四年解州以太師遣晉陽車
駕幸其第六宮及諸王盡從置酒極夜方罷帝欣甚詔金第
二子豐樂爲武衛大將軍賜帛五千匹謂曰公元勳佐命父
子忠誠朕當結以婚姻永爲藩衛仍詔金孫武都尙義甯公
主帝從皇太后幸金宅皇后太子諸王皆從後蠕蠕破散虛
其犯塞詔金屯兵白道以備之多所俘獲并表陳虜可取狀
文宣乃與金共討之進位右丞相食齊州幹遷左丞相孝昭
初納其孫女爲皇太子妃詔朝見聽乘步挽車至階武成初
禮遇彌重又納其孫女爲太子妃金長子光大將軍次子美
及孫武都並開府儀同三司出鎮方岳其餘子孫皆封侯貴
達一門一皇后二太子妃三公主尊重當時莫比金嘗謂光
曰我雖不讀書聞古來外戚梁冀等無不傾滅女若有寵諸

貴人妬女若無寵天子嫌之我家直以立勳抱忠致富貴豈
藉女也辭不獲免常以爲憂天統三年卒年八十贈假黃綬
相國太尉公贈錢百萬謚曰武

斛律光字明月金長子馬面彪身神爽雄傑少言笑工騎射
初隸侯景彭樂謂高敖曹曰斛律家小兒不可三度將行後
奪人名以庫直事文襄從出野見雁雙飛使光馳射之以一
矢俱落焉年十七從金西征馳馬射中周長史莫孝暉因擒
於陣擢都督封永樂子文襄校獵涇橋雲表見一大鳥光射
中其頸形如車輪旋轉而下乃鴈也丞相屬邢子高歎曰此
射鴈手也時號落鴈都督齊初別封西安縣子皇建元年進
鉅鹿郡公納其長女爲太子妃歷太子太傅爲書令司空司
徒河清三年周大司馬尉遲迥齊公憲庸公王雄等眾十萬

攻洛陽光率騎五萬馳往戰於邙山迴等大敗光親射雄殺之迴憲僅而獲免仍築京觀策動遷太尉嘗見椎河冰憂曰國家常有吞關隴之志今日至此而唯玩聲色先是第二女爲太子妃天統元年拜皇后光轉大將軍三年六月父喪詔起復秋除太保襲咸陽王遷太傅十二月周軍圍洛陽壅絕糧道武平元年正月詔光率步騎三萬禦之鋒刃纔交周將宇文傑眾大潰追至宜陽還擊齊王憲等眾大潰加右丞相并州刺史冬又率步騎五萬於玉壁築華谷龍門二城與憲相持憲不敢動二年率眾築平隴等鎮成十三所周柱國杞罕公普屯威柱國韋孝寬等來逼平隴戰於汾水大破之周遣柱國紇干廣略固宜陽光率步騎五萬戰於城下取周建安等四成捕千餘人而還軍未至鄴敕令便放兵散光以有

功者未得慰勞密表請使宣旨軍仍且進至紫陌駐營待使
帝聞光軍營已逼心甚惡之急令舍人追光入見然後宣勞
散兵拜左丞相別封清河郡公光嘗在朝堂垂簾而坐祖珽
乘馬過其前光怒曰此人乃敢爾後珽在內省言聲高慢光
又怒珽賂其從奴搯頭曰自公用事相王每夜抱膝歎曰盲
人用權國必破矣珽由是懼穆提婆求娶光庶女不許帝賜
提婆晉陽田光言於朝曰此田神武以來常種禾飼馬以擬
寇難今賜人無乃闕軍務也帝又以鄴清風園賜提婆光曰
此菜弱賜提婆是一家足若不賜提婆便百官足由是祖穆
積怨周將華孝寬懼光作謠言令間漏於鄴曰百升飛上天
明月照長安又曰高山不推自崩樹樹不扶自豎珽續之曰
盲老公背上下大斧饒舌老母不得語令小兒歌於路提婆

聞告其母令萱以饒舌爲斥已盲老公謂祖珽也遂協謀以謠言啟帝曰斛律累世大將明月聲震關西豐樂威行突厥女爲皇后男尙公主謠言可畏帝問韓長鸞長鸞以爲不可事廢光又嘗曰今軍人皆無裨袴後宮內參一賜數萬匹府藏稍空此是何理受賜者皆怨珽又通啟求見帝使以庫車載入珽請問唯何洪珍在側帝語及光洪珍進曰若本無意則可旣有此意不決行萬一事世如何帝然之而猶豫未決珽令武都妾兒頽茲告光謀不軌又令曹魏祖奏言上將星盛不誅恐有災禍旣而丞相府佐封士讓密啟云光前西討還敕令便放兵散光令軍逼帝京將爲不軌不果而止家藏弩甲奴僮千數每使豐樂武都處陰謀往來帝謂洪珍曰人心亦大聖我前疑其欲反果然珽請賜光一駿馬令明日乘

至東山遊觀須其來謝因執之及光至引入涼風堂劉桃枝
拉殺之年五十八血流於地剗之迹終不滅下詔稱其反族
之使二千石郎邢祖信籍其家琰問所得物祖信曰得弓十
五張宴射箭一百貝刀七口賜稍二張琰又厲聲曰更得何
物曰得粟子枝二十束擬奴僕與人鬪不問曲直卽杖一百
琰大慙祖信慨然曰好宰相尙死我何惜餘生人皆壯之光
居家嚴肅見子弟若君臣性節儉簡聲色不營財利杜絕饋
餉門無賓客罕與朝士交言不肯預政事每會議常獨後言
言輒合理將有表疏令人執筆口占之務從省實行兵用匈
奴卜法吉凶無不中軍營未定終不入幕或竟曰不坐身不
脫介冑常爲士卒先有罪者唯大杖撻背未嘗妄殺眾皆爭
爲之死宜陽之役謂周人曰歸我七年人不然取爾十倍周

人仰歸之在西境築定陽諸城馬上以鞭指畫所取地皆如其言拓地五百里而不伐已功自結髮從戎未嘗失律深爲隣敵懾憚罪旣不彰一旦屠滅朝野惜之周武帝聞光死赦其境內後入鄴追贈上柱國崇國公指詔書曰此人若在朕豈得至鄴長子武都特進開府儀同三司梁充二州刺史遇害於州少子鐘獲免周時襲封崇國公隋開皇中卒於車騎將軍

斛律羨字豐樂金次子少機警善騎射河清三年爲都督幽州刺史突厥十餘萬入總諸將禦之突厥望見軍容齊整遂不敢戰求款附天統元年五月可汗請朝貢羨有力焉加行臺僕射羨以寇屢入白庫堆戍東距海二千餘里凡有險要斬山築城斷谷起障置立戍邏五十餘所又道高梁水北會

易京東會於潞因以灌田公私獲利在州養馬二千匹部曲三千以備邊突厥謂之南面可汗四年進行臺尙書令別封高城縣侯羨歷事數帝稱謹直恆以合門貴盛爲憂武平元年乞解職不許秋進荆山郡王及光誅敕中領軍賀拔伏恩等十餘人馳驛捕之遣領軍大將軍鮮于桃枝洛州行臺僕射獨孤永業發定州騎卒進捕門者來白曰使人衷甲馬汗宜閉城門羨曰敕使豈可疑拒出迎之遂見執遇害臨刑歎曰富貴如此女爲皇后公主滿家常使三百兵何得不敗羨及光竝工騎射少時獵父金命子孫會射而觀之泣曰明月豐樂用弓不及我諸孫又不及明月豐樂世衰矣日令出田光獲少必麗龜遠掖羨獲雖多非要害所光恆蒙賞羨或被捶語人曰明月必背上著箭豐樂隨處卽下手數雖多去兒

遠矣聞者服其言

以上太原府

敬顯儁字孝英平陽人任俠有節操交結豪傑爲羽林監神武臨晉州儁因使謁見與語悅之乃啟爲別駕及義舉以儁爲行臺倉部郎中從攻鄴令儁造土山城拔又從平西胡轉都官尚書與諸將征討累有功又從平寇難破周文敗侯景平壽春定淮南略地三池口多築城戍累除兗州刺史卒

平陽府

韓祐字景祚上黨壺關人祖欽魏北海太守父尙生知藝術博極羣儒州辟主簿不就祐有行義天保十年特詔徵入禁闕累遷侍中開府儀同三司歷職恪勤恭敬周滅齊公卿將相降者皆處以原職祐懷節義去榮祿散志山泉終身不仕卒葬長子縣東韓坊村

蘇頌字瞻和上黨長子人祖洪雍州刺史父虎太原郡守頌
神資挺拔氣量高人善論兵武成聞其名徵授中山郡守知
齊將亡力辭歸年八十二卒墓在縣之東王村

以上潞安府

張亮字伯德西河隰城人初事尔朱兆兆奔秀容左右皆密
通誠款亮獨無敢疏兆死亮伏尸哭神武嘉歎之授丞相府
參軍漸見親待委以書記之任天平中爲文襄行臺郎中典
七兵事雖爲臺郎常在神武左右遷石丞高仲密叛與斛律
金守河陽周文帝於上流放火船欲燒河橋亮備小艇百餘
皆載長鎖鎖頭施釘火船將至卽馳小船以釘釘之引鎖向
岸火船不得及橋橋全亮之計也後自大中大夫拜幽州刺
史累遷尙書右僕射西南道行臺亮性質直勤力强濟深爲
神武文襄信任天保初別封安定縣男位中領軍卒贈司空

汾州府

張纂字徽纂代郡平城人爲尒朱兆長史使於神武遂被顧識及相州拔參丞相軍事封武安縣伯累遷行臺右丞從征玉壁軍還至晉州寒雨饑凍州以邊禁不聽入城時纂爲別使遇見輒令開門納之分寄人家給其火食多所全濟神武聞而善之纂事神武二十餘歲通傳教令甚見親賞文宣時卒於護軍將軍

王峻字巒嵩靈邱人明悟有幹略歷事神武文襄爲相府佐賜爵北平男除營州刺史遠設斥堠廣置疑兵邊賊不敢發合境獲安室韋不朝貢要其行路大破之虜酋帥厚加恩禮放還遂獻誠款蠕蠕主巷羅辰東徙峻設伏大破之於是遊走歷尙書河清中位南道行臺以罪配甲坊武平初卒於侍

中贈司空

薛孤延代人少驍果從神武起兵以功累加儀同三司從西
征至蒲津及寶烝失利班師延後殿且戰且行一日斫折十
五刀神武嘗閱馬於北牧道逢暴雨大雷火燒浮圖神武令
延觀之延按稍直前大呼繞浮圖走火遂滅延還嶺及馬鬣
尾皆焦神武嘆曰延乃能與霹靂鬪後封平秦公討潁川專
監造土山以酒醉爲敵所襲據齊初別賜爵都昌縣公延性
好酒率多昏醉以善戰每大軍征討常爲前鋒位太子太保
侯莫陳相代人祖社伏頹魏第一領人酋長父斛古提朔州
刺史白水公相七歲喪父號慕過人及長性雄傑從神武起
兵破韓陵力戰有功封陽平縣伯改封白水郡公天保初累
遷司空公進白水王又遷大將軍拜太尉公兼瀛州刺史歷

太保朔州刺史又授太傅別封義甯郡公卒於州贈假黃鉞
右丞相太宰太尉都督朔州刺史次子晉貴有幹略襲白水
王武衛將軍開府儀同三司梁州刺史歸周授上大將軍封
信安縣公子仲宣太常丞子宏穎宏信雍州司士參軍子行
方行儉行恭

蔡連猛字武兒代人父元成燕郡太守猛少有志氣便弓馬
初事尔朱榮榮沒從兆尔朱京纏欲投齊神武召與俱舉稍
謂曰不從我者死從至途卽背京纏復歸兆敗猛見獲杖
一百以配尉景旣而爲神武親信後尔朱文暢將爲亂猛曰
昔事其父兄甯今日受死不忍告而殺之神武聞之曰專人
當如此舍其罪而益親之以軍功封廣興縣侯梁使來聘求
角武藝文襄遣猛就館接之雙帶兩鞬左右馳射梁人引弓

兩張皆三石猛遂并取四張疊挽之過度梁人嗟服天保初除東秦州刺史河清三年加開府突厥逼晉陽猛覘一騎將超出來鬪卽斬之天統五年除并省尙書令領軍大將軍封山陽王及和士開死漸預朝政趙彥深引知機事祖珽排之出爲定州刺史削王爵以開府赴州寬惠清慎吏人稱之復授膠州刺史除大將軍齊亡人周卒

尉標代人從神武出山東大甯初位司徒封海昌王卒子相貴武平末開府儀同三司晉州道行臺尙書僕射晉州刺史行臺左丞侯子欽密啟周武帝請師求爲內應周武自率衆至城下子欽等夜開城門引軍入鎖相貴送長安卒相願標次子彊幹有膽略武平末領軍大將軍自平陽至并州及到鄴每立計將殺高阿那肱廢後主立廣甯王事竟不果及廣

甯被出相願拔佩刀斫柱而歎曰大事去矣知復何言

高寶甯代人武平末為營州刺史鎮和龍夷夏重其威信周

武帝平齊遣使招慰不受范陽王紹義在突厥寶甯上表勸

進范陽王署為丞相盧昌期據范陽起兵寶甯引紹義集夷

夏兵數萬救之至潞河知周宇文神舉屠范陽還據和龍竟

不臣周以上大同府

賀拔仁字天惠善無人以帳內都督從出山東破韓陵力戰

有功天保初封安定郡王歷數州刺史太保太師右丞相錄

尚書事武平元年卒贈假黃鉞相國太尉錄尚書十二州諸

軍事朔州刺史謚曰武

叱列平字殺鬼代郡西部人善射御襲第一領人酋長臨江

伯魏末以軍功至武衛將軍隨尔朱榮破葛榮平元顯封定

陶縣伯後歸神武從破韓陵天保初累遷兗州刺史開府儀
同三司卒贈都督瀛州刺史謚莊惠子孝冲嗣孝冲弟長父
武平末侍中開府儀同三司封新甯王隋開皇中位上柱國
卒於涇州刺史在官以清幹稱

以上朔平府

裴澤河東聞喜人魏廷尉卿鑿子也有文學孝昭初爲齊帥
奏舍人後魏收議謚孝昭爲恭烈澤正色抗論曰魏收死後
亦不肯爲恭烈之謚何容以擬大行且比皇太后不豫先帝
殮寢失常聖躬貶損今者易名必須加孝遂改爲孝昭因此
忤旨出爲廣州司馬尋歷中書侍郎兼給事黃門侍郎以漏
泄免後爲散騎常侍尋爲誹毀趙彥深等兼詠石榴以託意
決杖除名後主時爲清河郡守祖珽奏除尙書左丞又引爲
兼黃門與崔季舒等同以建言誅妻鉅鹿魏氏至性強立時

人以爲健婦云州

庫狄干善無人曾祖越豆眷魏道武時以功割善無之西賊
汗山地方百里以處之後北遷朔方干夔直少言有武藝正
光初授將軍宿衛於內孝昌元年奔雲中刺史費穆送於尔
朱榮隨入洛後從神武起兵破韓陵封廣平縣公進郡公轉
太保太傅神武討高仲密爲大都督前驅干上道不過家見
侯景不進食景使騎追饋之時周文自將兵至洛陽軍容甚
盛諸將未欲南度干決計濟河神武大兵繼至遂大破之還
爲定州刺史清約自居不爲吏人所患遷太師天平初以干
元勳佐命封章武郡王轉太宰干尙神武妹樂陵長公主以
親地見待常總大衆威望之重爲諸將所伏而最爲嚴猛會
詣京師魏謫王元孝友於公門言戲干正色責之時人稱善

卒贈假黃鉞太宰給輜輶車諡曰景烈皇建初配享神武廟

庭子伏敬位儀同三司卒

清水河廳

潘樂字相貴廣甯石門人本廣宗大族分鎮北邊因家焉父
永有技藝襲廣宗男樂寬厚有膽略葛榮敗隨尔朱榮爲別
將討元顥就封敷城縣男齊神武出牧晉州引爲鎮城都將
後從破廣阿進廣宗熙伯累以軍功拜東雍州刺史神武嘗
議廢州樂以東雍地帶山河境連胡蜀形勝之會不可棄也
遂如故後從破周師於河陰議追之令追者在西不願者東
唯樂與劉豐居西神武善之以衆不同而止改封金門郡公
文宣嗣事鎮河陽破西魏將楊樹等時帝以懷州刺史平鑿
等所築城深入敵境欲棄之樂以軹關要害必須防固乃更
修理增置兵將而還還鎮河陽拜司空齊初進河東郡王遷

司徒周文東至嶠陝遣其行臺侯莫陳崇從齊子嶺趣軹關
儀同楊樹從鼓鐘道出建州陷孤公成詔樂總大衆禦之樂
晝夜兼行至長子遣儀同韓永興從建州西趣崇崇遂遁又
爲南道大都督討侯景樂發石甃南度百餘里至梁涇州涇
州舊在石梁樂獲其地仍立州又克安州地除瀛州刺史仍
略淮漢天保六年卒於懸瓠賜假黃鉞太師大司馬尚書令
子子晃嗣沈密謹慤以清靖自居尙公主拜駙馬都尉武平
末爲幽州道行臺右僕射幽州刺史周師將入鄴率突騎數
萬赴援至博知鄴不守詣冀州降授上開府隋大業初卒
皮景和廣甯石門人初以親信事神武除庫直正都督天保
初授通州刺史封永甯縣子從襲庫莫奚度黃龍征契丹定
稽胡討蠕蠕每有戰功累遷殿中尙書侍中景和兼長吏事

性識平均武平中恆令案覆詔獄據理執正由是過無枉濫
後除特進封廣漢郡公遷領軍將軍琅琊王殺和士開兵指
西園請後主出千秋門自號令事平除尙書左僕射陳將吳
明徹寇淮南令景和拒之除領軍大將軍封文城郡王平陽
人鄭子饒詐設齋會用米麥不多供贍甚廣密從地藏漸出
餅飯愚人以為神見信於魏衛間潛度河聚眾數千號長樂
王破乘氏縣景和遣騎擊破之生禽子饒送京師吳明徹圍
壽陽與賀拔伏恩救之他將多傾覆唯景和全軍而還除尙
書令武平六年卒贈太尉錄尙書長子信機悟有風神位開
府儀同三司武衛將軍勳貴子弟中稱有識鑒降周授上開
府軍正中大夫隋開皇中卒於洮州刺史

以上薩
拉齊廳

韓軌字伯年太安狄那人志操深沈喜怒不形於色神武鎮

晉州引爲鎮城都督及起兵於信都軌贊成大策從破廣阿
又從破韓陵陣封平昌縣侯仍督中軍從破赤嶺再遷秦
州刺史甚得邊和神武巡秦州欲以軌還仍賜城人戶別絹
布兩匹州人田昭等七千戶皆辭不受唯乞留軌神武嘉歎
乃留焉頻以軍功進封安德郡公歷中書令司徒齊初封安德郡王
除官爵未幾復安德郡公歷中書令司徒齊初封安德郡王
軌妹爲神武所納生上黨王渙復以勳庸歷登台鉉謙恭自
處不以富貴驕人後拜大司馬從文宣征蠕蠕卒贈假黃鉞
太宰太師謚曰肅武皇建初配享文宣

韓晉明軌子嗣安德郡王改封東萊有俠氣留心學問招飲
賓客一席動費萬錢朝廷欲處之要地必以疾辭告人云廢
人飲美酒對名勝安能作刀筆吏披故紙乎武平末除尚書

左僕射百餘日便謝解官

斛律羌舉太安人少驍果從尒朱兆北破乃歸神武神武以其忠於所事亦加嗟賞天平中除大都督從戰沙苑羌舉曰黑獺若欲固守無糧援可恃今揣其情欲一死決有同獺犬或能噬人且渭曲土蒲無所用力若不與戰徑趣咸陽咸陽空虛可不戰而尅按其根本則黑獺之首可懸軍門時諸將議有異同遂戰於渭曲軍敗績後封密縣侯爲東夏州刺史卒贈儀同三司子孝卿嗣密縣侯聰敏機悟有風檢武平末位侍中開府儀同三司封義甯王知內省事典外兵騎兵機密時典機密者唯孝卿一人差居雅道後主至齊州爲尙書令歸周授儀同大將軍宣納上士隋開皇中位太府卿戶部

尙書

王紘字師羅太安狄那人父基讀書有智略神武遣往關中
周文留不遣後逃歸歷南益北豫二州刺史遇害贈吏部尚
書紘善騎射愛文學性敏捷年十三揚州刺史太原郭元貞
撫其背曰讀何書曰誦孝經曰孝經云何曰在上不驕爲下
不亂元貞曰吾豈驕乎紘曰君子防未萌亦願留意元貞稱
善十五隨父在北豫州行臺侯景與人論掩衣法爲常左右
尙書敬顯儻曰右衽應是紘進曰五帝吳儀三王殊制掩衣
左右何足是非景奇其早慧資以名馬興和中爲庫直奉朝
請文襄遇禍紘冒矢捍禦以忠節進爵平春縣男爲領左右
都督文宣嘗與左右飲酒曰快哉大樂紘曰亦有大苦帝曰
何苦紘曰長夜荒飲不悟國破是謂大苦帝默然武平初加
開府儀同三司上言突厥與周相影響宜爲之備尋兼侍中

聘周使還卽正未幾卒紘好著述作鑒誠二十四篇

可朱渾元字道元先世遼東人曾祖護野肱爲懷朔鎮將遂家焉元寬仁有武略少與齊高祖相知初隸余朱榮以功封東縣伯孝武帝立爲渭州刺史元既早爲高祖知遇恆表疏與高祖往來周文帝有疑心元乃率所部發渭州西北度烏蘭津歷河源二州境乃得東出從靈州東北入雲州高祖聞其來遣平陽守高崇迎之至晉陽引見執手賜帛千匹并奴婢田宅其兄弟四人先在并州者得進官爵所部督將皆賞以爵邑封元縣公除車騎大將軍從討西魏擒金祚皇甫智遷并州刺史天保初封扶風王顯祖時屢立戰功遷太師卒

以上烏拉特蒙古部

右北齊二十六人

案神武家懷朔故佐命多朔人解律氏本傳朔州敕勒部人考

敕勒有東西二部本高車族其降人附塞而居所
謂敕勒川陰山下者其地當在今蒙古烏拉特部
三旗管內舊志列光父子於今朔州誤矣茲改列
太原者本傳晉陽有金第其墓在縣西南十七里
亦見元和志忠良遺蹟荷有可徵不欲稍外之也
其他朔人審其地在蒙古者亦因七應牽連及之
藩部絕無記述此而不錄則英傑之
士長沒龍荒非博採旁搜之義矣